

嘉慶戊寅重修

嘉慶戊寅重修

# 三水縣志

省城心簡齋鐫

民國十有二年

癸未十月景梓

叙

志為史翼一方之文獻係焉學士  
大夫攷鏡得失蚩氓觀感嚮化  
司牧者晨披夕覽得首人程  
法而秉式之政之編者弗使室  
於行俗之媮者弗使狃於習治

教兩闕豈淺渺哉缺而勿脩孰  
職其咎旨哉前陶志中何端恪  
原序有非時弗成之語其知道  
乎三水志之失修已百餘年矣  
僕受事茲土裁八月耳非若久  
於其位者習與民相見舉凡禮

樂刑政之鉅細兵農財賦之損益  
民風淳薄之所趨土物燥濕之所宜  
莫不炳若星列而後施諸政事見  
諸文章以其暇日進二三才識之士  
相與取舊志斟酌而斧藻之徵文  
考獻與國史相表裏是固賢者

司之事也百餘年未前人既以事  
允未舉僕甫勝民社操刀懼傷  
何敢遽宏斯願哉會  
制府阮芸臺先生有

奏修通志之舉例徵各郡縣草志  
送局採輯邑紳士謀新舊志以獻

前署今李君有成議矣尋替還  
僕捧檄至聞之心竊喜語不云乎不  
習為吏視已成事舊志殘缺不足  
遵做得都人士條上隱顯不遺穢  
志諸君子以耆儒碩學各出機  
杼補其罅漏訂其謬誤輯為新

書僕閣手而仰其成徵實於一  
時留聲於後世此百餘年來  
之令尹所欲為而不暇為者及  
今為之為之而遂成何如斯之  
易也豈非吾

芸臺先生文采照耀遐迹欽矚

通志之輯為全粵之盛舉以修  
於上而下應之若此哉吾肄紳士  
如董孝廉思誠鄧孝廉雲龍  
輩皆有心當世之務不沾一章句  
自畫者能不舉邑乘為已任而  
勇於纂輯以副一時之盛哉新

志之成維其時也志既成呈稿於  
僕就意見所及略加刪潤時省局  
索觀甚急催檄頻煩僕適調  
篆禺山公事旁午即歸其橐  
俾授之梓志中纂新者什之四  
仍舊者什之六尚志成於康熙

四十九年邑令鄭君致手傳紀名  
帙頗簡率諸君子既重以前人  
之遺翰弗敢竄易僕又移官匆  
遽未及一二釐正區瑕完瑜觀成  
亟而任事踈亦時為之耳後之  
覽者幸亮察焉是為序者

賜進士出身廣東廣州府三水縣知縣  
今署番禺縣事盱山汪云任謨

修志姓氏

主修

署廣州府三水縣知縣李友榕

陝西生員

廣州府三水縣知縣調署番禺縣事汪云任

安徽進士

署廣州府三水縣知縣王履祥

直隸議叙

校正

三水縣儒學教諭莫若之

高明舉人

三水縣儒學訓導許建中

大埔舉人

協修

甲午科舉人原任唐山縣知縣鄧雲龍

邑人

三水縣志

卷之一

壹

辛酉科舉人揀選知縣丁丑大挑候補教諭陳攀桂

邑人

甲子科舉人揀選知縣丁丑大挑候補教諭陸鳳階

邑人

丁卯科舉人揀選知縣董思誠

邑人

校閱

職

員蔣業成

邑人

三水縣志

凡例

一志乘必分門類舊志卷分十五而紀載不無闕畧  
詮叙亦覺失次今增卷凡十六典謨尊 王言也  
星野紀天文也輿地重地利也由是量地以制邑  
度地以居民故建置次之九賦以足國九式以節  
用故賦役次之禮樂所以崇典學校所以造士故  
又次之以綏輯其鄉里故受之以秩官以保障其  
人民故受之以兵防水利富教備矣尤願其羽儀  
王國也故受之以選舉政治舉矣猶期其考正典  
型也故受之以秩官人物經年緯月故受之以編  
年徵文考獻故受之以藝文事有正有奇有疑有  
信故受之以雜錄終焉

三水縣志

卷之首

凡例

一

本朝

列聖相承凡頒發

諭旨堪與二典三謨永垂萬世舊志不載殊非體制今  
仿府志擇其切於吏治官箴民生士習者敬錄于  
首以重

編音



一舊志缺畧星野今訂增入並將氣候附後  
一地理除氣候凡附載方域形勢山川古蹟津渡虛  
市與夫風俗物產俱照舊志  
一建置凡城池公署屬署壇祠兵營倉庫養濟院義  
塚舊志俱皆備載惟間雜學制門類不清難以稽  
覽今悉爲釐正

一廟宇舊列外志非所以崇祀典也今附入建置  
一戶口貢賦前代載其總額

國朝會計則照現頒賦役全書舊志未見分晰詳叙  
今悉釐正其所載詳奉批准編審均役勒石碑文

### 三水縣志

#### 卷之首

凡例

二

因乾隆三十七年奉行編審之例無裨實政永行  
停止應行刪去至蛋埠魚課亦關稅餉似不應沿  
舊列入外志今改附條末

一舊志禮制未及儀注又無樂章祝文今照奉  
部頒行依類纂入

一學校舊志祇載學制其

### 文廟

#### 御書匾額

欽頒贊序并四配十二哲兩廡先賢先儒姓名位次及  
崇聖祠配享姓名位次俱不恭錄今悉增人

一兵制不可一日不備三邑城守始設守備繼改都司今仍改守備其將弁駐防營汛兵目皆照額設開載併增入鋪驛

一水利舊志止載隄寶至津渡則附入地理橋梁但分見鄉圖未見彙載今各從其類一併登入

一選舉鄉會兩科舊志姓名間有失載今查通志載入人物亦不無遺漏採訪查有確據皆爲補載

一舊志選舉內列入國學生但國學與鄉學地雖不同而其爲諸生則一若國學入志庠生安得獨遺今僅仍舊志餘概不載至報捐職銜不由文武生

三水縣志

卷之首

凡例

三

員者亦不濫登

一鄉賓舊志止在耆壽名次下註明似屬不類今另開一欸其由舉貢生員者備載于志由耆老舉者概不登載

一列女已經旌表者入志其未經旌表者果貞白自矢年例相符報縣批准亦備載姓名立表立傳至從前遺漏未入者悉查核續入以彰闡範

一藝文必先制誥所以尊王言也其記序詩文擇其有關於世道人心者始爲選編若咏物感懷祝賀贈答之詞先達自有文集無庸備載於志

一志書原不過因事紀事因人紀人凡地方利病惟司牧者隨時經畫見之行事不在空言其有前人論說事關國計民生之要不敢刪去庶訪求利弊者得究心焉

三水縣志

序文

修誌姓氏

凡例

目錄

卷首

典謨

卷一

星野 附氣候

輿地

三水縣志

卷之首

目錄

一

總圖 縣坊圖 縣署圖 學宮圖 鄉圖

形勢 方域 山川 古蹟 墟市 風俗

物產 附潮汐

卷二

建置

城池 公署 行臺 倉庫 壇祠 廟宇

養濟院 漏澤園 監獄

卷三

賦役

圖里 戶口 田賦 起運 存留 稅契

匠餉 鹽課 權稅 當餉 渡餉 積儲  
屯田 附蛋埠

卷四

禮樂

朝賀 祭祀 鄉飲酒禮

卷五

學校

學制 祀典 守藏 書籍 常額 書院  
社學 學田

卷六

三水縣志

卷之首

目錄

二

秩官表

官制 附員役

卷七

兵制

民壯 營哨 附保甲 附驛舖

卷八

水利

隄竇 津梁

卷九

選舉

薦辟 進士 舉人 貢途 武科 文職  
武職 封贈 恩廕 援例

卷十

秩官傳

卷十一

人物傳

忠侃 賢良 宦蹟 儒行 文學 孝義  
潛德 隱逸 武畧 鄉賓 耆壽

卷十二

列女傳

三水縣志

卷之首

目錄

三

卷十三

編年 附災祥

卷十四

藝文上

制誥 奏疏 記

卷十五

藝文下

序 論 賦 詩

卷十六

雜錄

寺觀 神異

跋

三水縣志

卷之首

目錄

四

舊志原序

嘉靖四十二年

宗伯

何維柏

邑人

陶侯修三水志成來徵予言爲序予讀之感焉縣治肇自嘉靖丙戌析南海高要若干里合而成邑邑當二廣之衝北自滇江合武水而西南自牂牁合漓鬱諸水而東東距清海沂石門轉折而西而南會于邑是爲三水兩藩鎮巡監司命使暨諸郡縣百官島夷貢獻皆取道出此舟車罔晝夜公私浮費百倍他邑卽清遠高要各直一路民猶僞僂不支矧惟三水今城中鮮人居寡貿易生齒落莫四郊墟曠百凡餼饋夫徒供億率取辦鄉市倍直

三水縣志

卷之首

書序

一

而豫需民滋不堪西南胥江素稱利藪今索索然敝轉相逋逃大兵經臨瀕河民無寧宇邑南境故俗崇樸修讓習勤力本無奇表告訐習諸邑弗如也至于嚴內外秩尊卑謹婚禮重祀祭睦宗鄰敦里約予行游四方四方弗如也乃亦稍稍變易倣澆踵訛此何故也吾聞長人者厚生導俗顧以逆送趨承需奉弭愆違詬不暇又奚民之能恤故建邑且四十年更十數令未聞循聲顯擢豈時盡使然哉要必有分任其咎者侯當吾民憔悴之極饑饉師旅薦仍獨能嫗乳率育心易政平民是用依



而廉慎才敏足以飭蠱集事用是克當上意而當道羣公宏度並濟不貴苛小甄別優勵侯蓋得以盡所事事而又能以暇自率其學官子弟修邑志夫志非學弗詳非公弗覈非才弗達非時弗成是志也詳而覈明而達又得時以成之非茲邑幸耶而侯則自言曰吾何人也曷敢言志然志者籍也籍其往以貽來也猶之家焉凡戶產經常之數家之長必籍之以詔子若孫而吾忝茲土當周知境內人民土地之數凡山川之形勝封疆之險易戶口之登耗賦役之繁省風俗之媿惡教化之隆汙

三水縣志

卷之首

舊序

二

治蹟之得失惟籍而記之俾後之人有稽焉民所未便者思以生息而蕃殖之勞來而安定之利導而節縮之匡翼而振作之經理而整肅之夫籍存庶其布之上下民有所利賴蓋吾志也若夫毀譽是非之事則吾豈敢言善善也倘傳聞之混實幽隱之未宣者當俟後之君子嗟乎侯用心勤矣然予又有感焉夫志識也邑典也是非予奪世道攸繫孟子有言盡信書則不如無書武城周書也且不可盡信况其他乎司馬氏世典周史遷良史才也猶病其是非謬於聖人後之好譏議人者多以

私臆繩賢否其去遷也益遠夫君子褒貶美刺載筆於書所以信今而示後奚可以弗慎也如其弗慎雖郡乘弗傳省志弗錄豈惟邑侯詳覽博采以屬諸生必無弗慎者而猶欲然有所俟予因推侯志識吾感以告夫後之君子

又序

申丞 李義壯 邑人

三水縣設于今將四十年矣而未有志陶君允徵至則有志焉未暇也越三年而政成乃考縣之故而創爲之嘆曰茲惟艱哉吾欲觀於建置之沿革山川之形勝封疆廬井之限制而無所於籍也乃

三水縣志

卷之首

舊序

三

以考之全志有遺言焉吾欲觀於田賦之上下風俗之媿惡因革損益之終始而無所於徵也乃以質之里正有隱辭焉吾欲觀於官聯之失得士習之汗隆禮樂刑政之統紀而無所於稽也乃以詢之故老有遺知焉則以文獻不足爾已夫子曰吾欲觀夏道杞不足徵也吾欲觀殷道宋不足徵也其殆有感於斯乎夫志也者固一縣之文獻所繫也及今不修後將何觀然今郡縣之爲志亦多矣率不附麗于史法而藝文是工不知史以記往志以開來記往以存鑒戒開來則經綸之迹存焉此

體例之辨而致用則有間焉於是創爲名例以授于博士董子大恩周子郡而董修之踰年而志成以示予且以序爲請余閱之三則旣燦燦乎微而彰曲而備矣乃若允徵之爲縣也一至是乎夫山谿疆界雖非固國域民之本然肇建郡邑之初以備制度則不可缺也故首之以封域地僻則民聚民聚則邑成故次之以民物衆庶民庶而後設官以爲民極故次之以官師官師者政事所繇以出焉者也道有升降政繇俗革窮則變矣變則通矣故次之以政事夫正立而經正經正而民興髦士於是偕作而有志于道者蓋蒸蒸矣故次之以人材君子之志於道也不可不察夫邪正之辨也故次之以外志外也者外之也自虛無幻誕之說興而後災祥詭異之徵作有民社者不可不慎也故以雜志終焉而志斯成矣他日欲求三水之文獻者安知其不在茲乎昔令尹子文舉舊政以告新尹夫子以爲忠何也爲其推物我無間之心而尤憂後之作者不能如今日也此志成謀始者藉以不替效法者視以不眩其爲告也不亦大乎使嗣是而爲令者誠能鑒此而行之三水將不永有攸

賴哉陶君名守訓字允徵別號望沙西甌之平樂人予視學時所舉士當時嘉其有志乃今果然焉孰謂爲政之無本也

舊志序

崇正十二年

大學士

何吾驕

香山

三水縣治縮轂廣州西南保界高要南海肇車藍縷剏嘉靖初臺監使者風檣日往還如織事居送往霍文敏蚤灼知民將不堪矣要以地衝而阻國倚毗合彈壓調劑邑供億啼呼民又倚毗合急公求莫故百城之長爲邑民批窾郤借前籌任匪輕也三水創垂迄今七十載循卓指不多偃余家先

三水縣志

卷之首

舊序

五

端恪公謂有分其咎者洵不誣哉臨安高侯受事僅兩期循聲藉甚巡方榜侯治績懸諸國門爲百城風厲侯治平概可覩已初侯之下車也念邑當四達之衢民當竭澤之候操刀而割四顧躊躇考獻徵文茫乎未備遂慨然有志三水之舉爰詳當事介士紳稽簿書叅掌故補三十年殘闕之遺續四十年沿革興釐汚隆澆樸之故嗣徽陶志爲上下篇如紀如表如志傳絲緒條分碁置奕如星麗離離如也嗟乎百城之長鞅掌戴星載籍得失之林類高閣置矧僕僕河干無踰三水而年來中外

眷眷徵繕頻仍令方露肘捉襟仰應司農之不暇  
而暇弄柔翰擁圖書爲考獻徵文地乎端恪嘗序  
陶志曰非時弗成汪司馬伯玉論志亦謂得時尤  
難夫今時較陶合時羸絀何似緩急何似臨我者  
程期何似長我者瞻依何似而侯強教悅安固圉  
銷萌而外取故實而商確之取先民而揚扇之取  
踐更田賦丁夫流移登耗而綜覈之一似乎侯之  
日無冬無夏咸舒以長侯之政無巨無纖咸整以  
暇也且也志邑雖文獻一方道法事辭何啻參半  
或者采春華忘秋實縱合牛汗何關治平侯獨原

三水縣志

卷之首

舊序

六

建官之意於天罄親民之事於志微第浮夸瑣尾  
不敢溷昭垂卽文物表章猶遜之二三君子故其  
篇中所臚列輒引其端大指歸諸子惠吾民救寧  
吾邑俾善建垂諸不拔害馬無復潛滋以無負擔  
爵析圭卽媚庶民爲媚天子意也抑又聞之曰不  
習爲吏視已成事前事不忘後事之師今而後剖  
符三水讀侯志稟成焉暗室一鐙事半而功且倍  
三水人士讀侯志躍興焉道德文章先民具在他  
無論如先端恪當日偕侯先石山公事世廟朝危  
行危言幾瀕九死比神廟賜環氣節烏奕海內欽

則侯至互相勞問先代丰采宛然昨日人倫師表  
南北有光一攤書有餘矣然則斯志也養民具焉  
致賢具焉勸來章往具焉一舉而四善該謂侯治  
平大業文章忠義併該焉可也猗歟伸楮濡毫侯  
識其大而一嚮識全烝一勺辨淄澠余於侯亦觀  
其大矣脫稿快讀特泚筆以告管城侯子墨客鄉  
之從事夫文獻者

又序

知縣 高其昌

浙江人

天生民而立之君因建親民之官分符錫綬俾得  
拊綏而安輯之以無至失所凡以答天也王者因

三水縣志

卷之首

舊序

七

是有大一統志載在天府而郡邑咸得師其意以  
見之於書迨政成之日陳風貢俗以報政於天子  
其藉有紀載者非淺也三水設自嘉靖初年割南  
分要幅員僅五十三里越後漸增至五十有六踰  
三十年而始有陶公之志至於今七十餘載矣向  
未修輯其昌自戊寅之春受事茲土晉謁上臺命  
之曰凡爲民牧者先提其大綱而後萬目畢張民  
情土俗曷以志乎攷之其昌對之曰唯唯及遍搜  
舊稿已成蠹餘且自揣愚昧無似風塵歷落簿書  
鞅掌因商之學博鄭君亦爲其事之久需此舉也

遂毅然任之因走幣於鄉紳李君諱士安孝廉梁君諱挺桂李君諱鍾穎馮君諱顯忠皆熟於傳聞嫻於紀載兼之邑庠弟子員如陳生羔梁生嗣楨吳生京歐陽生大業陸生象陸生嘉士皆能蜚英揆藻爲士林翹楚於是修輯之事得諸君子分任之而其昌止酌定而訂正焉而志遂告成分編類引載之詳矣大約明天之時順地之理尊王之制章國之體兵農禮樂總非一端因革損益亦非一道要之有益于民者則載之以示知所脩舉有害於民者則備之以示知所裁抑不失上天生民之

心與大君爲民之意變通善俗仁化宜民斯已矣志之成也實賴上臺示其的諸君子翼其成其昌藉是以塞責焉爾獨思設官原以爲民而吏茲土者乃精神結於身家氣志移於溫飽更不復念民間之疾苦當此地瘠力疲之日三水之民幾不堪命矣若是則與設官之義何居願後之君子其善綏此疲民也庶幾其有瘳也夫雖然剖斗折衡而民不爭作誥作誓而民滋僞當事者亦惟粹白心源端厥身範使四國則而象之而宇內共敦分誼以不失爲下之義則惟是可由而不可知名率其

蚩蚩之性以相若於大化庶幾一道同風共囿于一統之盛治而無媿於志林耳若曰文辭之表章足以傳信以示後是獵諸君子之功能而文一已之固陋此其昌之所大恐也簡言以識其端

又序

教諭鄭廷樞

澄海人

三水縣之有志自嘉靖四十一年知縣事粵西陶侯始也逾七十餘年而今乃重修則高吉生邑尊之志也邑尊下車卽考風問俗商榷政教機宜慨然於邑事日積志乘久懸取舊志繙閱之蓋胸有成竹矣乃請諸上臺議修之猶以爲舉七十餘年

三水縣志

卷之首

舊序

九

之事而綜覽焉其務繁併合前志三十餘年之事而參訂焉其緒又錯未易獨以簿書兼也爲書幣敦請鄉紳李二溟明府李視發孝廉梁子生孝廉正其體裁徵邑庠士陳生羔梁生嗣楨吳生京歐陽生大業陸生象陸生嘉士分司纂修事而命不佞廷樞董其成二孝廉以簡嚴之筆準經式史爲編年紀事一書弁諸卷端廷樞及六生則斂集官司行移士民揭報出入於舊志中分例編葺之每例各有大引具出高邑尊手裁李明府以淹博之識時有論著則鑑古規今言多典則共計十有二



例而定爲上下二卷土地邑之所繇以設也故上卷首輿圖邑旣議設則必經營其規制以奠官府神人之居故次建置規制旣備而上下灌輸以通一邑之氣脈者財用也故次賦役財用旣足則可講求乎文物以修饗祀祈報之典故次禮制文物內盛而遠近戒嚴以厚一邑之營衛者兵壯也故次武備然兵壯以慎不虞原非幹辦之用彼庶人在官古備之矣故員役次之是爲上卷上卷者志邑之常經如卦象之有內爻以言乎其體質也夫以輿圖之廣建置之大賦役之繁禮制武備之悉

索於是乎有員役之設者將以聽于政教之司而安戢其境土也故下卷首官師表焉政教所施有得有失其淪洽人心久而勿諉者崇報所繇隆也故次名宦傳有表率一邑而垂循良之聲者則亦有譽髦斯士而濟科名之美者故次人物表人物不一其致身通顯者旣多隆軌德業而亦有淡約幽隱守卓而行芳者皆可述而志也故次人材傳大凡人之可傳者其著述必足以章明政理羽翼道教而維持乎彝常也故次之以文藝若夫存奇攷異則緒餘而已矣故謂之雜誌而下卷終焉下

卷者志邑之盛業如卦象之有外爻以言乎其發用也此十二例者草創固紛而難矣討論猶參差訛逸而難也啟事月餘間六生屬稿方就緒因科試逼近皆告歸肄業而獨以其事畱遺于廷樾顧樾又見事不博握管無法再殫兩月工書搜宵訂篇裁句摩歷幾煩瑣廢幾精神尙夢夢然如逐影耳尙渙渙然如博沙耳賴李明府與二孝廉往來商榷可否共濟邑尊畱神主裁不厭聒瀆時得呈覽而校正焉而馮介孚孝廉後至過從語論又每每有以發我覆也乃得藉手成事要其所爲夢夢

三水縣志

卷之首

舊序

士

者渙渙者終無以自解也討論蓋若斯之難哉若昔人所謂修飾之工潤色之雅則概乎未有與矧任瘁近愚攬成近專寬收則疑濫慎駁則疑刻其非之嫉之怨之撓之者所不能免則亦任謬悠之失與六生分罪焉耳然而高邑尊之引言李明府之論斷梁李二孝廉之事紀則既有論有要矣昇識者分別觀之可也

又序

石埭知縣

李士安邑人

人心內有日月燈焉日昱於晝月昱於夜是爲照善惡之譜國之有史邑之有志所以濟日月之窮

夫志亦史耳古志則舊心燈也今志則新心燈也  
春秋以盛聖特聞嗣茲而下有編年有紀傳或記  
二千餘年或撰二十一史亦婉亦直亦獨任亦衆  
叅因革廢興爛然有第一印可而書山自舞色筆  
囿自生香耳目膽力亦自恢宏而穩壯此舊心燈  
所宜按也我高皇祖混一廣輪夢醒長夜嘗敕合  
番直史館者編紀時政據事直書藏之鑰櫃詳而  
一統志簡而六諭箴資世禮儀諸訓孝慈精誠各  
錄大之禮樂兵農細而米鹽茶鐵揭經制於星垂  
顯筆削於霆斷真斗維不忒日月爲昭最稱國史

三水縣志

卷之首

舊序

三

大關頭若不叅透此關慙皮駮夢將何處打入別  
局此新心燈所宜欽也吾邑建自世廟五年地儉  
而衢衝日異而月不同舊志久模弔古者病於無  
稽丁丑秋鄭學師擁鐸再至與不佞及諸孝廉談  
及曠典輒喜而願襄其成特以青氈坐冷合不能  
行一間右必以待當事者云邀今高侯銜命而來  
矚舊志亟與學師商之謂爲政之體要存焉於是  
謀諸不佞與孝廉矜子就室而珍從之覈諸殘篇  
斷簡之餘收諸里巷小民之口相與商確攷証信  
者因之疑者闕之訛者正之繁冗者刪之未備者

補之時有可采者續之爲目十二羅之舊志者半綴之新志者半沿革變更纒纒數千言所謂條條智也夫引壽光而妍媸別尋跡府而善敗瞭後之君子讀而細玩之於未備未續者又復鋪張弗替知爲吾邑不朽之徽典實出邑侯煦育之功學師拮据之力斯志也今古大心燈其恍德之毋不疲于屢照乎勿等之蚩冷符可矣

舊志序

康熙十二年

知縣蘇

嶠河南人

國有史家有乘郡邑之有志猶是也然則志可無乎曰曷可無也無志則凡天時地利民情土俗建

三水縣志

卷之首

舊序

三

置沿革賦役戶口人物藝文皆無所考據而圖維官斯土者蚩蚩耳賀賀耳志曷可無也雖然志易有乎曰弗易有也有志則凡天道歲時知所變理地勢險易知所握防民情土俗知所調劑建置沿革知所損益賦役戶口知所稽覈紀人物而知所以示勸戒覽藝文而知所以廣見聞秉筆者非直諒多聞德才兼備烏能勝厥任而愉快哉志弗易有也嶠以中原一介士剖符綰綬於三水衝敞之區匪惟治術未諳抑且風土迥別下車以來畱心邑志夫亦曰觀於志而得爲政之道毋俾蚩蚩賀

贊以從事也詎兵燹之餘簡冊散失多方構覓於  
一二舊家殘編中搜獲四本乃寓目焉蓋陶侯始  
成之高侯重修之迄茲今昔異時改剏異制多所  
缺畧而不全慨然有纂裁釐定之想居無何  
今上允輔臣請

敕天下修大清一統志肆雖彈丸邑亦在版圖中嶠奉  
檄董事實獲我心爰集邑之紳士慎選勝厥任而  
愉快者商酌蒐羅討論修飾大抵縷析條分一循  
往例而於遞傳之年代鼎新之規模形勝之興衰  
戶役之增減與夫人之繼起文之續成者或刪繁  
三水縣志  
卷之首  
而務簡或去舊而登新或正其訛或補其缺要歸  
於核確靡遺公明至當而已矣是役也書成而上  
於

朝較曩者一邑一令之私舉大相逕庭嶠不敏式賴  
諸君子博學強記華瞻淹通以襄盛典將後之官  
斯土居斯土者咸有所取法觀感爲慈父母爲佳  
子弟洵不負

聖天子家天下之至意云爾

舊志序

康熙四十九年

知縣

鄭

玫

福建人

郡邑之有志何昉乎自禹貢所載凡田賦高下之

異等墳壙黎赤之異壤名山大川之異名至于山  
珍海錯篠蕩箛籥漆泉締紵之物多男少女多女  
少男之地靡不巨細畢載古人豈好爲是纖悉哉  
誠以利用厚生正德皆取資焉不可遺也後世郡  
邑有志雖倣乎史而實權輿於此顧志有得者亦  
有失者其得者于山川原隰田賦戶口水利物產  
選舉武備官師謠俗有源有委綱舉目張有關於  
吏治有益于民生其失者則異是所重者或畧而  
不詳所輕者反詳而不畧如釋老之廬怪譎之事  
臺榭之故址詞人風雲月露之什連篇累牘不一  
志崇正戊寅高侯其昌修之

國朝康熙癸丑蘇侯嶠復修之自癸丑至今三十有

八年矣此數十年中官署壇廟有新建者坡堤橋

梁有修復者官師有陞遷者戶役鹽政有增益者

與夫孝義節烈之已旌未旌者文人學士之詩文

有係於世教者今不纂錄後將無傳乃集邑之紳

士商之僉曰唯唯願公董其事余自媿樸拙少文

值邑際衝繁簿書期會加以送往迎來日無寧晷

何敢任其事顧旣允紳士之請義不敢辭乃分日  
力晝治吏事夜校邑志訪諸縉紳遺逸而叅以眇  
見無關於吏治民生者概汰而不登至其書之有  
得而無失則前賢之所載具在余不敢掠美以邀  
名也其叅校則教諭謝君式南訓導李君文煒

三水縣志卷之首

典謨

世祖章皇帝

御製大清律序 順治三年

朕惟

太祖

太宗創業東方民淳法簡大辟之外惟有鞭笞朕仰荷天庥撫臨中夏人民既衆情僞多端每遇奏讞輕重出入頗繁擬議律例未定有司無所稟承爰敕法司官廣集廷議詳譯明律參以國制增損劑量期於平

三水縣志

卷之首

典謨

一

允書成奏進朕再三覆閱仍命內院諸臣校訂妥確乃允刊布名曰大清律集解附例爾內外有司官吏敬此成憲勿得任意低昂務使百官萬民畏名義而重犯法冀幾刑措之風以昭我

祖宗之德子孫臣民其世世守之

臥碑

順治九年二月禮部題定奉

欽作刊立臥碑曉示生員

朝廷建立學校選取生員免其丁糧厚以廩膳設學院學道學官以教之各衙門官以禮相待全要



養成賢才以供

朝廷之用諸生皆當上報

國恩下立人品所有教條開列于後

一生員之家父母賢知者子當受教父母愚魯或有非爲者子旣讀書明理當再三懇告使父母不陷於危亡

一生員立志當學爲忠臣清官書史所載忠清事蹟務須互相講究凡利國愛民之事更宜留心

一生員居心忠厚正直讀書方有實用出仕必作良吏若心術邪刻讀書必無成就爲官必取禍患

三水縣志

卷之首

典謨

二

行害人之事者往往自殺其身常當思省

一生員不可干求官長交結勢要希圖進身若果心善德全上天知之必加以福

一生員當愛身忍性凡有官司衙門不可輕入卽有切已之事止許家人代告不許干與他人詞訟亦不許牽生員作証

一爲學當敬先生若講說皆須誠心聽受如有未明當從容再問毋妄行辯難爲師者亦當盡心教訓勿致怠惰

一軍民一切利病不許生員上書陳言如有一言

建白以違制論

一生員不許糾黨多人立盟結社把持官府武斷鄉曲所作文字不許妄行刊刻違者聽提調官治罪

聖祖仁皇帝上諭十六條

康熙十八年

敦孝弟以重人倫

篤宗族以昭雍睦

和鄉黨以息爭訟

重農桑以足衣食

尚節儉以惜財用

隆學校以端士習

黜異端以崇正學

講法律以儆愚頑

明禮讓以厚風俗

務本業以定民志

三水縣志

卷之首

典謨

三

訓子弟以禁非爲

息誣告以全善良

戒匿逃以免株連

完錢糧以省催科

聯保甲以弭盜賊

解讐忿以重身命

御製訓飭士子文

康熙四十一年

國家建立學校原以興行教化作育人材典至渥也朕臨御以來隆重師儒加意庠序近復慎簡學使釐剔弊端務令風教修明賢才蔚起庶幾棧樸作人之意乃比年士習未端儒效罕著雖因內外臣工奉行未能盡善亦由爾諸生積錮已久粹難改易之故也茲特親製訓言再加警飭爾諸生其

敬聽之從來學者先立品行次及文學學術事功源委有敘爾諸生幼聞庭訓長列宮牆朝夕誦讀寧無講究必也躬修實踐砥礪廉隅敦孝順以事親秉忠貞以立志窮經考業勿雜荒誕之談取友親師悉化僑盈之氣文章歸於醇雅母事浮華軌度式於規繩最防蕩軼子衿佻達自昔所譏苟行止有虧雖讀書何益若夫宅心弗淑行已多愆或蜚語流言脅制官長或隱糧包訟出入公門或唆撥姦猾欺孤凌弱或招呼朋類結社邀盟乃如之人名教不容鄉黨勿齒縱倖脫褫朴濫竊章縫返

三水縣志

卷之首

典謨

四

之於衷寧無媿乎况乎鄉會科名乃掄才大典關係尤鉅士子果有真才實學何患困不逢年顧乃標榜虛名暗通聲氣夤緣詭遇罔顧身家又或改竄鄉貫希圖進取囂凌騰沸網利營私種種弊端深可痛恨且夫士子出身之始尤貴以正若茲厥初拜獻便已作姦犯科則異時敗檢踰閑何所不至又安望其秉公持正爲國家宣猷樹績膺後先疏附之選哉朕用嘉惠爾等故不禁反復惓惓茲訓言頒到爾等務共體朕心恪遵明訓一切痛加改省爭自濯磨積行勤學以圖上進國家三年登

造束帛弓旌不特爾身有榮卽爾祖父亦增光寵矣逢時得志寧俟他求哉若乃視爲具文玩愒勿做毀方躍冶暴棄自甘則是爾等冥頑無知終不能率教也旣負栽培復干咎戾王章具在朕亦不能爲爾等寬矣自茲以往內而國學外而直省鄉校凡學臣師長皆有司鐸之責者並宜傳集諸生多方董勸以副朕懷否則職業勿修咎亦難追勿謂朕言之不預也爾多士尙敬聽之哉

世宗憲皇帝諭知州知縣

雍正元年

朕惟國家首重吏治爾州牧縣令乃親民之官吏治

三水縣志

卷之首

典謨

五

之始基也貢賦訟獄爾實司之品秩雖卑職任綦重州縣官賢則民先受其利州縣官不肖則民先受其害膺茲任者當體朝廷惠養元元之意以愛民爲先務周察葺屋緩輯鄉里治行果有其實循卓自有其名非內聚賄而外干譽謂之名實兼收也全省吏治如作室然督撫其棟梁也司道其垣墉也州縣其基址也書云民惟邦本本固邦寧夫所以固邦本者在吏治而吏治之本在州縣苟州縣之品行不端猶基不立則室不固庸有濟乎

皇考臨御六十一年灼知州縣之重特行引見咨詢明試

至詳至慎其有廉能之員每不次超擢以示鼓勵  
今海內羣黎皆

皇考所懷保也朕膺

宗社重寄思繼

皇考之治功惟爾州縣諸臣具有父母斯民之責其爲朕  
立之基址以固邦本焉誠能潔已奉公實心盡職  
一州一縣之中興仁興讓教孝教忠物阜民安刑  
清訟簡朕將升之朝宁用作股肱如或罔念民瘼  
恣意貪婪或朘削肥家或濫刑逞虐或借刻以爲  
清或恃才而多事或諂媚上司以貪位或任縱胥

三水縣志

卷之首

典謨

六

吏以擾民或徇私逞欲以上虧國帑王章具在豈  
爾貸歟更有任州縣時私肥已橐而漫云且俟顯  
要方立名節者其與初市清名晚而改操之人何  
以異哉至於錢糧關係尤重絲毫夥粒皆百姓之  
脂膏增一分則民受一分之累減一分則民沾一  
分之澤前有請暫加火耗抵補虧空帑項者

皇考示諭在廷不允其請爾諸臣共聞之矣今州縣火耗  
任意加增視爲成例民何以堪乎嗣後斷宜禁止  
或被上司察核或被科道糾叅必從重治罪決不  
寬貸夫欲清虧空之源莫如節儉正直節儉則用

無不足正直則上官不可干以私若賤小民之生以飽上官之貪欲冒不測之罪以快一時之奢侈豈砥礪廉隅爲民父母之道乎爾州縣等官其恪共乃職勿貽罪戾毋謂地遠官卑朕不及察其賢否也特諭

諭勸農

雍正二年

上諭朕惟撫養元元之道足用爲先朕自臨御以來無刻不厯念民依重農務本業已三令五申矣但我國家休養生息數十年來口口日繁而土田止有此數非率天下農民竭力耕耘兼收倍獲欲家

三水縣志

卷之首

典謨

七

室盈寧必不可得周官所載巡稼之官不一而足又有保介田畷日在田間皆爲課農設也今課農雖無專官然自督撫以下孰不兼此任也其各督率有司悉心相勸並不時諮訪疾苦有絲毫妨於農業者必爲除去仍於每鄉中擇一二老農之勤勞作苦者優其獎賞以示鼓勵如此則農民知勸而惰者可化爲勤矣再舍傍田畔以及荒山不可耕種之處度量土宜種植樹木桑柘可以飼蠶棗栗可以佐食柏桐可以資用卽榛楛雜木亦足以供炊爨其令有司督率指畫課令種植仍嚴禁非

時之斧斤牛羊之踐踏奸徒之盜竊亦爲民利不  
小至孳養牲畜如北方之羊南北之彘牧養如法  
乳字以時於生計不無裨益總之小民至愚經營  
衣食非不迫切而於目前自然之利反多忽畧所  
賴親民之官委曲周詳多方勸導庶使踴躍爭先  
人力無遺而地利始盡不惟民生可厚風俗亦可  
還淳爾督撫等官各體朕惓惓愛民之意實心奉  
行倘視爲具文苟且塗飾或反以擾民則尤其不  
可也

高宗純皇帝

三水縣志

卷之首

典謨

八

恤教職

乾隆元年

上諭教職乃師儒之官有督課士子之責素蒙

皇考世宗憲皇帝加恩優待屢次訓勉且與有司一體賞  
給封典朕卽位以來念伊等官秩卑微恐以冗散  
自居不思殫心盡職特加品級以鼓勵之查舊例  
教職兩官同食一俸未免不敷養廉着從乾隆元  
年春季爲始照各員品級給與全俸永著爲例欽  
此

今上皇帝

御製義利辨

嘉慶十四年

義利者何公私之別耳易曰乾始能以美利利天下不言所利大矣哉當取之利必合於義未嘗不可以語人公之謂也背義而取之利害必隨之故不可以語人私之謂也公卽天理私卽人欲存心天理必不妄取若徇人欲必至敗度所謂博施濟衆與天下之人同天下之利富有四海澤被八方豈損上益下哉實自益耳若橫征暴斂聚財積貨圖目前有限之歡娛貽身後無窮之大患豈損下益上哉乃自損耳君道如是臣節亦同事君以敬爲先爲政以廉爲本順理而行屏除物欲知足不辱知止不殆違義之利絲毫不染旣非悖入之財斷無悖出之事誠全身遠害之大猷福延子孫名煥簡冊賢臣之所願也好貨財者自有肺腸逞其貪心縱欲徇利不顧不義罔恤國家親其所不親爲人所不爲卒至惡積日深禍由自作身被刑戮妻子流離無一倖免良可悲夫總由不辨義利不辨公私不明理欲不顧是非之所致也財散民聚重義而輕利也公天下之大道堯舜禹湯政之大端也財聚民散見利而忘義也徇一己之私欲桀紂赧獻失國之大畧也無遠慮必有近憂圖大利



終憂大害君臣同應儆戒上下交相勸勉庶幾朝  
無佞臣郡少貪吏民鮮攘竊戶有蓋藏將見政簡  
刑清風淳俗美我君臣期共勉之繫以銘曰  
識見母小心志勿馳大智不惑大勇不移錙銖較  
量堪憫愚癡視財如寶惡因日滋水滿必決貨積  
禍隨日中則昃月滿則虧天道如是奚不慎思日  
宣三德衷凜四知非義不取至公無私寸心不放  
暗室不欺富藏天下俗臻皞熙百工弼亮成此銘  
詞

御製崇儉詩

三水縣志

卷之首

典謨

十

尚儉訓臣民美德萬善備守約固本心去奢勵衆  
志末俗愛繁華夤緣以財餌私欲漸薰蒸忘義卽  
徇利悖入千萬盈悖出糞土棄眼底金帛光日後  
身家累天理所不容國法所必至嗟哉貪亂徒人  
形實鬼魅昏夜枉乞憐離明奚能避總由不儉成  
稔惡日月積正已興讓廉杼誠消詐僞尺度豈可  
踰潔已弭浮議勿貽後世憂勿作無益事艱思爲  
君難任大守神器渴願司牧賢弼予圖邳治天良  
慎毋欺常德保厥位